



22. oktober 2009

Inatsisartut suleriaasianni § 36, imm. 1 naapertorlugu Naalakkersuisunut apeqqut imaattoq matumuuna saqqummiuppara:

**Naalakkersuisunut apeqqut: Kinguaariit nangittagaannik kræfteqarsinnaanermut misissortittarnerup ukiut tamaasa pisartussap ukioq allortarlugu pisalersimanera aningaasanik sipaarnernermik tunngaveqarpa?**

(Inatsisartuni ilaasortaq Bitten Høegh-Dam, Siumut)

**Tunngavilersuut:**

Peqqinnissaqarfimmit erseqqissarneqarpoq kinguaariit nangittagaannik kræfteqarsinnaanermut misissortittarneq ukiut tamaasa pisartussaasoq ukioq allortarlugu ingerlanneqartalersimasoq. Peqqinnissamut naalakkersuisup Inatsisartunut nassuiaateqarnermini pinaveersaartitsineq suliniutissatut pingaarnertut saqqummiuppara. Misissortittarneq ukiut tamaasa pisartussaagaluartoq ukioq allortarlugu pisalersimanera saqqummiussinermi sipaarniutaanera naalakkersuisuni ilaasortap erseqqissanngilaa. Tamannarpiaavorlu apeqquteqaateqarninnut tunngavigisarpiara.

Kinguaariit nangittagaannik kræfteqalersinnaasut misissortittartut Qallunaat Nunaannitut periarfissaqartitaasut ilanngullugu oqaatigineqarpoq, tamatumalu uppersararnejarnissaa kissaatigaara.

Naalakkersuisuni ilaasortap pinaveersaartitsineq tunngavittut eqqartorpaa, assersuutigalugit imigassamik, pujortarnermik allatullu inuunerlunnermik atuisut kræfteqalersartut eqqartorpai, taamaattunillu atuisuusunut pinaveersaartitsinissaq pingaartuutillugu oqaariartuutigalugu.

Naluneqanngitsutut aamma kinguaariit nangittagaannik kræftimik nappaateqarsinnaanermut qaninnerulersoqarsinnaasoq nalunngilarput, misissortittarnerullu akuttornera sipaarniutaasimappat inuiaqatigiinnut ersarissatigisariaqarpoq, taamaasilluta erseqqissaavigineqarnitsigut ersarissumik paasitinneqassagatta.

Ersarissumik paatsuugassaanngitsumillu ullut akissuteqarfissaatitaasut iluanni akineqarnissara piumasaraara.